

九江府志卷之十三

人物志

夫天地無全功聖人無全能天地聖人且爾況其餘者哉是故曰道德曰文章曰忠節曰孝義曰廉能曰武藝曰才望與夫幽貞高尚之類苟得一善成名亦鳳毛麟甲罕見也况其精誠所格幽足以感鬼神明足以昭日星大足以動天地遠足以風百世豈細故哉論人者以盡而不

恕則非矣爰志人物

忠節

陶潛字淵明潯陽人侃曾孫少好高尚博學善屬文宅有五柳自號五柳先生親老家貧起為州祭酒尋自解歸再起為彭澤令在官八十餘日郡遣督郵至縣吏白當束帶見之潛嘆曰吾不能為五斗米折腰於鄉里小兒即解印賦歸去來辭以見志隱于柴桑山栗里又號羲皇上人及宋受禪惟飲

酒賦詩紀年以甲子示終身不臣之意後朱熹以
比楚屈平漢張良唐狄仁傑云

宋顏希孔彭澤人為本縣簿宋末元師逼取安慶江州
等地希孔奮力率民兵八百餘大聚舟楫各載石
以萬計戰於江心以石擊之敵舟幾隕元師大駭
及其力乏石盡為敵所執遂慷慨授首今鳳凰山
麓有廢塚在焉

士行

九江府志卷之十三

三

吳江夢孫字聿修德安人家世業儒博綜經史孝弟高
潔為江都令先是縣廳每有出示禍蒞政者率遷於
別廳夢孫下車輒升廳受賀向夜具袍笏端坐誦
易怪遂息後以親疾歸事繼母甚孝每躬耕罷集
生徒講禮嘗有盜至夢孫束帶迎候設酒食罄所
有以去遺一鼎蓋夢孫曰遺此乃為不具之器復
遣與之群盜驚嘆曰吾輩小人實瀆君子卒贈國
子司業子直木以神童擢第仕至兵部員外郎

宋范芸軒德化人任平樂府儒學教授家構一堂名義聚五世同爨元貞間郡邑達于省臺聞於朝遂旌褒復其家

李受德化人為太子少保乞歸廬山哲宗詔玉珪司馬光呂公著等餞飲于資政堂命賦詩以贈之弟東之自經筵官去歸上亦命珪等賦詩以送當時榮之以比漢二疏云

王寓德化人任資政殿學士兼侍講歷官至國子司業中書舍人欽宗立遷翰林學士尚書左丞副康王使金因丐免降單州團練使并黜父易簡建炎中賊破江州與父俱被害

陳競德安人唐僖宗時已六世不分南唐復其家至孫昉之世宗族七百餘口畜犬百餘一犬不至諸犬不食宋開寶初仍復其家昉弟子鴻鴻弟競競之世子孫益衆詔每歲貸粟二千石競卒從弟旭止受貸粟之半值歲歉或勸旭全受可邀善價旭

曰朝廷以旭家乏食而貸之粟豈可見利忘義邪
事聞獎嘆拜江州助教旭卒弟蘊主家事鄉里稱
其德仁宗仍賜為本州助教歷十八世而同居焉
許祚德化人八世同居至祚之世七百八十餘口太
宗時詔旌表其門與陳氏同稱

馬適字志達湖口人祖良俊卒葬于幞頭山時讖曰
沙洲圓出狀元適生自幼聰敏勤苦嗜學奉母篤
孝建隆三年沙洲始圓果登狀元第以母故守制

終于家

國朝孫復字明德德化人通春秋遭元末兵亂避兵池
州時統兵何文輝聞其賢召與語奇之留置幕下
日與論攻戰之計卒之下湖廣平江西俘偽漢復
之功居多文輝陞都督延復於家事以師禮及文
輝卒子幼復為營喪事畢歸故里居焉洪武中膺
明經薦授本府儒學訓導改瑞昌卒于官有示子
孫錄藏于家廬陵劉子高陳善為作傳贊

劉俊字克乂湖口人自幼聰睿善屬詩文洪武間以按察使房安薦入中都國子上舍未幾循例依親躬耕力學動必以禮後授本學訓導人謂所職不盡其長

周文湖口人洪武間由貢入監上疏乞終養家居二十五年後授山東壽張縣主簿調四川新津縣所至俱有惠政尋歸省不起卒于家

劉昱彭澤人永樂初由進士任刑科給事中剛正果言數有建白于朝行已端方士論重之

胡杲字東暘德化人領弘治壬子鄉舉養晦于家二十餘年正德間任浙江景寧縣知縣有惠政三年因入覲遂懇歸卒年七十五

勞濟字本仁德化人知府鉞之子也自幼穎敏長而苦學如閩如浙皆負笈從游通五經尤長於詩年四十二始舉鄉薦教人以存心不欺為主江州士夫多出其門卒年五十人皆惜其道之未達也

官業

晉周訪潯陽人自少沉毅果斷而能謙讓為縣功曹元帝立改揚烈將軍討華軼平江州定漢沔累遷都督梁州諸軍事屯襄陽遠近悅服蔚然為中興名將王敦忌之雖懷逆謀不敢發卒謚曰壯

周撫訪之子強毅有父風元帝時官至征虜將軍都督梁州諸軍事擊蜀寇破之遷鎮西將軍卒謚曰襄第光亦有父風從温嶠破蘇峻有功賜爵曲江

男

周楚撫之子監梁益二州襲爵建城公世在梁益甚得物情時以討平司馬飭進冠軍將軍卒謚曰定子瓊勁烈有將畧歷數郡累遷梁州刺史建武將軍

周虓撫之孫歷官梓潼太守符堅寇梓潼虓固守郡城遣步騎送母妻抵江陵為符堅將所獲虓不得已降後與堅兄子苞謀襲堅事泄堅引問虓曰虓

世荷晉恩生為晉臣死為晉鬼復何問堅曰殺之適所以成其名捷之謫太原病卒其子興迎致其喪贈龍驤將軍益州刺史

宋胡旦字周父德安人咸平六年狀元授朝奉郎都尉賜緋衣金魚紫囊兵部郎中直秘閣上柱國賜紫金魚袋其誥曰爾稱俊邁亟歷官常咸有公材聞于朝著

王彥繼字處道德安人韶次子初以父功詔除大理評事紹聖初上方畧請經理西事宗寧中知河州遷熙河師以闢湟鄯功拜武勝軍觀察留後專以恩信結戎心卒贈寧遠軍節度謚莊敏弟彥博靖康初勤王亦有功

吳元字季誠德安人與弟宏字季剛愈字季謙聯登進士詩云勒馬江邊問玉京有花頭上占梅英雲霄萬里開鵬路詩樂三章奏鹿鳴拂劍笑談天下事擔簦慷慨日邊行吳公兄弟誰先後此事君王

合與評元官至制誥累贈正議大夫宏任饒州司
戶愈初尉信陽金兵圍城守令皆逸愈提兵率邑
民為助以帛十餘丈作大旗一特書吳愈二字敵
望之遁去歷官沿江制置使兼知鄂州邊陸平康
入直翰苑兵部侍郎卒贈光祿大夫少師謚文肅
吳革字時夫元之子也三領舉於漕肄業南康白鹿
書院理宗朝筮任撫州之崇仁尉三歷庫官宰錢
塘倅杭歷至文華閣學士刑部尚書沿江制置使
江東安撫行宮留守知建康府兼淮西總領贈光
祿大夫謚清惠公每以崇正學基化本宣德達情
為已任

吳觀字賓夫宏之子也宋兩試漕舉世濟其美知分
寧縣括私帑置田數百畝立存惠倉以賑貧民去
後民為立祠官至朝請大夫湖廣提刑兼知衡州
轉江西提刑兼知贛州又轉江東提刑知饒州不
愧家聲云

胡清德安人旦之曾孫也紹興十三年授羽衛大夫
貴州防禦使有茂績於民封武功縣開國男食邑
三百戶

王阮德安人韶之曾孫少好學尚氣節隆興初進士
對策極言宜遷都建康以圖進取紹熙中知濠州
修戰守具金人不敢南侵改知撫州韓侂胄聞阮
名特命入奏阮對畢即出關侂胄大怒批旨予奉
祠於是歸隱廬山盡棄人間事從容觴詠而已

呂文德字景修居九江城北仕宋官至京湖安撫制
置大使衛國公封和義郡王謚武忠

國朝黃信彭澤人洪武中任廣東道御史陞廣西按察
使改湖廣布政使終右副都御史為人剛方不屈
深得紀綱之體當時論彭澤德望信為首稱云

劉隆字尚文彭澤人洪武中由監生擢廣州府同知
勤於政事尋陞福建叅議未幾轉廣西閩之士庶
慕其惠澤懇疏乞留復陞福建按察司副使巡視

海道備倭肅整民獲安靖居官三十年操守如一
劉剛仲彭澤人賦性冲澹不苟取予事親曲盡愛敬
洪武中以孝廉舉授浙江仁和縣知縣清操苦節
無玷所薦云

柯振祖彭澤人賦性穎敏博學能文制行剛方不徇
時好洪武中以賢良方正舉任湖口縣學訓導克
端楷範士類賴其甄陶云

吳禮德化人由監生洪武間任浙江金華知縣以廉
能稱後調嘉興及河南西平煩劇之地厥蹟益懋
擢知河曲州後改濟寧陞雲南大理府同知致政
歸卒年七十三

凌守誠彭澤人洪武間由人材任興化府倉副使倜
儻不群以異行聞于上超陞浙江金華府知府改
廣東韶州府感主上之知竭忠貞之力一官二郡
政蹟赫然

謝敬湖口人由監生洪武中任四川道御史直道自

信不避權勢海內稱之

周璟瑞昌人由舉人任刑科給事中永樂間以邊餉功陞山西左布政使撫安有道北境稱便九年考蹟百姓上疏懇留復任二十一年正統初致仕

周泰亨彭澤人由進士永樂中任廣西道御史巡按直隸湖廣二處克貞憲度百僚肅清後陞湖廣僉事而卒

周南湖口人由監生永樂間任四川通江縣知縣鋤

惡惠善備有政聲疏民事十條於朝俱見俞允後引年致仕

史中德化人由監生永樂中任衡州府通判守法治民不畏強勢尋陞本府知府時有中官貪橫舟經其地中搜詰密奏於朝上命戮之朝野驚服後轉陝西左叅政致仕卒于家

游端德化人由監生永樂間任給事中彈劾時政無所顧忌陞鎮江府知府綽有惠政上下相安在任

十八年致政歸民卧留車前脫其靴以繫思云

燕善德化人由舉人永樂間任湖廣常德府武陵縣知縣馭吏以嚴撫民以寬人比古之良吏時入覲受勅旌異尋陞太僕寺丞

王恪字孟誠湖口人由進士永樂中任廣東道御史歷任湖廣陝西按察司僉事至四川右叅議所在有聲後卒人狀其行曰肅風紀於憲臺權奸斂手施惠政於藩省民庶歸心

周振德安人永樂乙未進士任浙江道監察御史蒞事之初慨然有澄清之志間行伺察悉知民隱按治貪墨絕無所貸後陞廣東按察司僉事祛革宿弊嶺南肅清致政卒于家

豐慶瑞昌人正統己未進士任兵科給事中劾權奸持風采歷陞河南左布政使清徃役之編正稅糧之派中州稱便後占籍于浙子熙翰林學士孫坊登甲科代有文名云

駱敏湖口人正統壬戌舉會試魁任湖廣按察司僉事時楚藩不法敏密疏上聞遂歸後徵為祭酒不起制令有司月給俸廩優禮特異

王恕字尚忠湖口人由進士景泰間任兵部主事陞郎中復陞廣東參議諳天象熟兵法時征猺寇恕為副貳而閩帥倚賴遂獲捷焉卒于官

呂鐸字文振德化人由進士任兵部主事陞員外郎成化間轉山東右參議後至浙江左參政為人寬簡與物無競嘗給內帑賑邊不私羨餘以廉能著于朝野

勞鉞字廷器德化人由進士任應天江浦知縣轉臨清山陽俱有政聲成化中陞太僕寺丞復陞浙江湖州知府子惠庶民澤潤千里卒于官湖人立廟祀之

史珩字廷玉德化人中之子也景泰甲戌進士任直隸宿遷知縣有父風烈節費愛民不畏權勢以此

獲咎當道轉陞鎮江府通判晚節益堅未幾解綬而歸士論重之

周慰字民望德化人由監生成化間任四川夔州府巫山縣知縣巡撫都御史孫仁舉稱才識敏捷堪以治劇援更賢育民例調重慶府巴縣任滿致仕卒年八十

劉清字一之德化人由進士成化間任浙江嵯縣知縣改瑞安歷任數載惟勸稼穡清牒訟勤教化見

重當道尋陞太僕寺丞卒于官

夏英字育才德化人由進士成化間授南京工部主事陞郎中經畫周至國裕而民不擾弘治初陞延平知府丁內艱復改邵武興文學勸農桑均徭役廣儲蓄聲馳八閩卒于官所著有方田集并蒞祚典要

黃鳳字廷儀德化人由監生弘治初授湖廣陵湘縣知縣練達有為御民以信值歲歉周旋賑恤邑不

告饑九載秩滿以所得俸貲推給親族年八十四而卒

歐陽剛字元用彭澤人由監生弘治間任南京北城兵馬指揮清慎自持陞福建邵武府通判雖督催科不失撫字後擢湖廣隨州知州命下解組而歸囊橐蕭然年逾八十忽一日衣冠端坐誦魯論首篇而終

廖紀字惟修別號湓江九江衛人由進士正德初授浙江安吉知州以奏最陞南京兵部職方員外轉北京工部都水司郎中尋改營繕奉公執法多忤權豪陞福建延平知府又歷平陽政聲益著嘉靖五年陞廣西按察司副使值思恩田州叛極力征剿因遘疾卒于官

謝壘字蘭貴湖口人由監生正德末任淮安清河縣縣丞值年大旱設法賑濟民活甚衆時有盜掠其邑素聞清約相戒勿入其廨九載乞休惟携弊篋

一二以歸尋卒

孫冕字文中德安人由監生任直隸通州訓導賦性剛直才識明敏持身清謹又勤於訓迪變易士習陞新城縣學教諭卒于官

文苑

晉謝靈運潯陽人幼穎悟詩文之美為江南第一初入廬山見僧慧遠欲與結社遠以心雜止之乃於山中鑿二池植紅白蓮以寄情焉

皇甫謐字士安潯陽人博綜典籍百家之言時人謂之書筭自號玄晏先生其子方回少有文材閉戶閑居未嘗入城府其篤學有父之風

唐元結字次山瑞昌人年十七始折節問學家居灤濱號灤溪浪士嘗著元子十篇揚復見其文曰一第溷子耳擢上第肅宗朝為蒼梧刺史多政蹟進營管經畧使身論蠻豪綏定八州民樂其教後棄官居江夏樊上入猗玕洞稱猗玕子又稱漫郎後家

春陵結屋浯溪上作大唐中興頌磨崖碑又有灋叟之號進時義三篇

宋夏竦字子喬德安人父承皓太宗時與契丹戰歿以恩補官上書應制舉其畧以邊障多故羽書旁午先臣承詔徇國殞身今陛下哀臣孤幼任之州縣若令臣條具急政指陳時事猶可與漢唐諸儒方轡並驅帝嘉之景德中御試有宦者以吳綾乞詩公題云殿上衮衣明日月硯中旗影動龍蛇縱橫

禮樂三千字獨對丹墀日未斜擢賢良方正第一知洪州立條教於閭里立保伍之法盜賊不敢發累官中書門下平章事封英國公徙鄭國公卒贈太師中書令謚文莊有文集及箋表行于世

王韶字子純德安人嘉祐進士熙寧初上平戎策請復河湟神宗用委甚專六年之間卒復河湟洮岷等州拜觀文殿學士召為樞密副使出知洪州薨謚襄敏所著有敷陽集熙河陣法奏議諸書

其楚枋德化人號梅坡通五經名重於時屢與江西
浙江湖廣河南行省科舉文衡後為武岡縣尹而
卒

劉日章德安人由進士授太常博士陞工部侍郎有
文集名工部集行于世子孫相繼不絕宗族之內
往往業儒雖經兵火支派凋零然存者尚聚居一
鄉其餘風蓋未泯也

孝友

李時彭澤人母病思魚羹携釜求于港終日不得叩
地慟天俄有一叟問之時告以故叟導之曰此宜
舉釜遂得一鯉歸奉母病乃痊鄉閭異之今名其
港曰母鯉

黃貴字天賜彭澤人充邑庠生時居父喪隣里失火
延燒其宅貴一無所顧惟撫棺號哭時與聞者義
而舉之火亦滅息人以爲孝誠所感

國朝 易鼎新瑞昌人父早沒奉母甚孝母沒寢苦枕塊

葬廬墓側三年悲如一日有白雉烏鴉暮宿朝飛哀
鳴若助悲意人以為孝感貳守謝公英作詩美之
張文獻字道徵湖口邑庠生父蚤喪事繼母王氏甚
謹家貧授徒養弟妹竭力婚嫁正德七年流賊突
至其家獻以母疾不忍去賊感其孝遺以金提學
副使周廣巡撫都御史陳洪謨相繼旌異焉

黃相字國佐德化人自幼寡言勤學登正德丁丑進
士觀吏部政歸家省親值己卯寧賊之變負母奔
石塘舖松林之麓時六月亢暑感熱疾三日而卒
鄉人稱其孝而惜其窮也舒狀元題其墓云

義勇

南唐周勅瑞昌人天祐初亂勅以勇敏應江西防遏使
司徒鍾公表補江州軍總管陞御史中丞領尚書
事時群雄割據無敢窺江淮尺地者勅之功居多

國朝

歐陽尚誠彭澤人居家孝友仁愛值元末兵亂集
衆保障民賴以安

大明天兵征陳友諒駐彭澤尚誠卒衆犒師

太祖高皇帝即位召至京授世襲本縣令力辭復授本縣縣丞終其身仍 賜鐵券銀器遣歸第尚八從征奮勇直前遂遇害乘騎奔走如生至家乃墮鄉人神而祠之

方庸字文中湖口人少業儒知大義正德十四年逆濠舟泊湖口庸奮勇率衆拒敵衆潰力不能支被執不屈遂罹害知縣章玄梅有詩吊云天地百年增正氣江山千古盡忠魂九原此去無遺恨贏得人稱義士門

隱逸

晉翟湯字道深潯陽人篤行廉潔耕而後食不屑世事人有餽遺一無所受永嘉末寇害相繼聞湯名德皆不敢犯王道亮屢薦為國子博士不起其子荏荏子矯矯子法皆有高行公車徵之皆不就四世俱有隱德號潯陽四隱

陶淡潯陽人侃之孫幼孤好導引之術年十五六時
已知服食絕穀家累千金僮僕百數淡終日端坐
曾不營問好讀易善卜筮後隱廬山不知所終

周續之字道祖號紫芝潯陽人受業於范甯通五經
五緯號十經既而閑居讀易晉末隱於廬山號竹
坡先生

劉遺民字子驥本彭城聚里人晉末入廬山與僧慧
遠結白蓮社時周續之陶靖節俱不就徵號潯陽

三隱

宋鄭良德安人善果之孫克承家訓樂道不仕精于地
理嘗與子誼公等登紫巖峰觀敷淺原勢有白鹿
躍於馬前慨然語諸子曰吾家以義相傳吾當葬
此更其壠曰孝志取其孝友之義也更其坂曰萬
家廣其子孫之義也公歿葬斯地厥後子孫繁衍
柝居東衝谷步永泰南宅泗溪東坑義豐瑞昌等
地著譜牒者千餘家

張夢祥彭澤人宣和間進士時欽宗為金人逼之北
行夢祥被執不屈金主義而釋之退隱仁磯終身
不仕

通戴羽德安人隱居積學徵辟皆不就著武侯通傳三
卷史評一卷虞集為之序

周舜弼瑞昌人與弟仲亨從子方嘗從朱子講學於
白鹿洞書院號稱高第隱居不仕

國朝王賢字茂先德化人性質直畧涉經史善於醫永

樂間九江衛指揮許壽衡州知府史中俱以賢良
方正薦辭不就惟以醫濟人不責其報一日行至
玉波橋畔拾遺金一餅遂於其所候其主至驗而
還之卒年九十三

鄧林瑞昌人端謹厚重不求仕進厭邑居紛擾築室
於溫泉之巖植松數百株號松窩居士

歐陽珍字良玉彭澤人通經史能詩文其貧樂隱不
趨勢利一日患疽毒焚香祝天曰珍生平行虧就

令速死毋毀吾親遺體不三日而愈年八十無恙而卒嘉靖間入祀鄉賢

柳濟字孟淵別號耕叟德化人賦性淳雅不與人爭善楷書父鑑得疾濟事之踰年不倦異母弟凌侮百出愛之愈篤弟遂感化喜飲酒雖多不亂卒年六十四

陳璉瑞昌人自少讀書尚義鄉里重之屢應例冠帶不就嘗出粟三百石助賑不履塵市者三十年別

號巖山

楊繕字原善德化人通易經善詞章其貧教授不求聞達鄉人重之有司屢請鄉飲不赴卒年七十

羅允中字惟誠德化人號匡廬野逸賦性坦夷好吟詠積圖書博覽不倦隱居授徒卒年八十

流寓

三國程普北平土垠人三國時周瑜破赤壁普為裨將因家于華容後領兵駐江州之赤烏鎮終於營葬

鎮之東南半里許普孫顯文因徙依于墓右子孫家焉遂為桂林程氏云

唐鄭善果本鄭州滎陽人先事魏以忠蓋唐武德間拜刑部尚書貞觀初出為江州刺史歿于官遂葬于德安葛洪山後子孫因家焉

李白字太白成紀人十歲通詩書賀知章見其文嘆曰子謫仙才也性喜名山飄然有物外之志玄宗時嘗供奉翰林後遭祿山之亂遂避地寓居廬山

陳伯宣宜都王陳叔明之後陳瓘之子生於閩之仙遊隱居廬山註司馬遷史記徵詔不起就領著作郎其孫旺遂占籍德安太平鄉六世孫崇為江州長吏治家有法累世同居至南唐大順間孫衮為司戶參軍試大常寺奉禮郎後表立義門以旌之

五代史虛白字畏名北海人五代間中原多故卜居潯陽韓熙載薦之元宗召至便殿訪以國事辭曰漁釣之人安知邦國大計因賜田遣歸有古溪集行

于世

歐陽敷字華道鄧州南陽人漢隱帝間為中書舍人
繼秉天雄軍節鉞周太祖時為光祿大夫檢校尚
書侍郎後因兵亂避居九華山徙隱彭澤十三都
筠塘淳化間卒遂葬於其地子擘登咸平進士歷
官常侍以父墓在縣遂家焉

南唐

伍喬廬江人入廬山白鹿洞苦節力學一夕見人
掌自牖入上有讀易二字因取易探索精微時有

浮屠仰視一大星旁有人指曰此伍喬星也既覺
訪得喬傾資奉之後舉進士第一仕為考功郎祀
于白鹿洞

宋

周惇頤字茂叔道州人熙寧間知南康軍每過潯陽
愛廬山之勝濯纓漣溪而樂之因築室居焉後沒
遂葬德化清泉社次子壽休而居之元末避兵復
居瑞昌檀木岫今邑周姓者多其後也

程顥字伯淳程頤字正叔洛中人父珦攝南安通守

事與周惇頤爲友後惇頤講道廬山濂溪珣使二子從游焉

岳飛靖康間鎮九江母死葬于德化縣株嶺太陽山之麓子孫因家焉

元黃澤其先蜀人父儀可累舉不第隨從子官九江因家焉澤生有異質慨然以明經學道爲志作易春秋二經解大德中授江州景星書院山長吳澄以爲平生所見經士未有能及之者

黃德隆山東人元爲江州萬戶管軍尚節既元末城陷與總管李黼同死於兵因世居高良山之麓後子姓多讀書淳厚人以爲德隆所積云

貞烈

國朝畢彥昇妻鄭氏彭澤人鄭英長女年十八而嫁踰

三月而夫亡遺腹生子仲遠鄭執貧撫孤孀節終始弗渝洪武中

詔旌表其門

董氏南昌董用和女年二十五適德化縣民魏輔甫四載生男魏宏中而寡董守節奉舅姑終身無玷永樂中

詔旌表其門

柯茂妻王氏彭澤縣民王哲之女年十九而嫁踰三

載夫亡勤儉孝敬鞠育二子守義不衰卒年七十五姪柯嶼妻陽氏年二十七而寡撫其子璿貞節自守年七十而終人稱為二節云

宋永華妻陽氏彭澤人教授陽暹之女年十八適宋生子文淮文海不五載而夫逝清苦守節以禮自閑孀居幾五十年卒壽七十五

黃氏德化人郡庠生劉相妻知縣黃鳳之女也相迎父喪沒于濟寧柩至黃觸柩流血被面欲以死殉

時年二十有一形毀骨立矢志靡他衰經十年事繼姑益謹貧苦守節四十餘年人皆賢之

萬氏瑞昌人萬志郁之女年十七歸邑人吳琴六年而寡或有諷其再醮者則以死自誓孝事舅姑治家勤儉次子守栢卒業南雍皆萬撫成之力也正德間知縣黃源大以事

聞詔旌其門

李氏瑞昌人陳璉之妻年二十而寡生子方半歲踰三年子亦喪其兄哀其艾而無嗣欲逆其志李迺嚙指出血誓死靡他孝養舅姑終身不衰後立其姪以承夫祀壽六十而終

程綱妻王氏彭澤人年二十夫亡鞠子友隆守節不踰至八十而終

張仲偉妻周氏名端秀湖口人年二十而寡子德澗甫一歲舅姑憫其家貧子幼欲奪其志周曰寧為張氏鬼不作他人妻孀居三十年清節一致鄉里

嘗記其言以為內則

陶氏彭澤人王守邦妻年二十夫以暴疾卒陶哀毀欲與俱死翁慟其子越宿亦亡陶嘆曰我即死死姑何倚哉乃營夫葬預虛其右以示同穴人不敢干以非言事姑盡孝完節而終內外咸重之

南湖甯巡檢司吏諶娃妻及其女正德七年流賊至欲污之三人厲聲罵賊不絕口俱被支解而死至今人哀悼之但未知婦為誰何氏

余氏孝綉湖口人余志通女年十八歲家貧未受聘正德七年流賊劫縣女與隣婦俱被擄至舟女獨投河而死

李氏九江衛人郡庠生李溥妹年十五在室正德己卯逆濠陷城勢突至女急謂兄曰禍迫矣兄為全毋計乃自潛避於隣家并傍頃之賊至女遂投井而死賊亦驚惕

王志廉妻郭氏南昌衛人年二十五而夫亡生一子

名朝臣郭撫之成立兼經理家政甚謹守節四十餘年里人重之

周昂妻蔡氏德化人監生浦之女年二十二而寡昂求訣時以一銅簪屬之曰汝勿忘此蔡泣受之後佩服五十餘年簪磨蝕太半清苦之操始終無玷撫二女皆成人婚嫁如禮鄉人欽之

韓廷珪妻孫氏蘇州吳縣人廷珪以商販為生旅寓潯陽小江口梅繼家孫與二女隨寓焉正德己卯

六月十八日逆濠兵陷九江居民奔走先是廷珪往龍坑粥貨未回孫謂女曰我輩異鄉人欲他往寔無可依汝父又不在今賊已劫隣家矣柰何女曰死生不相離也於是母女共取一長繩聯束其腰相携投河而死時孫年三十五長女年十四幼女年十一云

三烈傳

蘇山范永鑾曰嘉靖壬辰五月予按九江暇

閩郡志載孫氏者名大姐夫吳人也姓韓名
廷珪携孫以鬻蓆治生孫以二女從長名金
蓮年十四次名玉蓮年十一孫時年三十五
旅潯陽小江口梅繼家珪復外出正德己卯
六月十八日逆濠遣賊陷江州城大肆剝掠
將及梅居時孫有外戚羅文忠者聞急密邀
孫逃孫知不免萬一辱及何以復立於天地
間顧其二女曰吾外人不可以他往計無出

一死其女皆曰生死無相離乃以長索聯屬
束之高聲謂隣居曰夫還幸語之母以我母
子爲念吾計得矣遂赴河死烈哉烈哉予三
復之不覺驚嘆然慮其訛也喚繼詢焉歷道
之故且謂孫性整潔坐守一室未嘗輕出門
戶人少見其顏面求其夫則云孫亡一醮之
後不忍復商此地矣嗚呼生死之際君不能
強其臣父不能強其子夫不能強其妻母不

能強其女孫氏以母死而二女從是何不強
而同以全一家之貞武穆之後僅見此耳豈
不烈哉予嘗集正德時流賊倡亂執節死義
者一十有九人傳其事以刻於薊溪棠陵方
子又收其一二所不及者爲風貞四曲以補
之然或妻妾爲其夫兒女爲其父僕從爲其
主剛腸正氣固凜凜照耀今古而亦未有若
孫氏一母二女同心視死如歸如是之烈也

乃知山林草莽之間貞完氣全者不幸遭時
不祥未必無人或有所知而未揚可
勝嘆哉故爲之立傳題曰三烈俟觀風者採
焉

孫氏勘議

孫氏韓廷珪妻直隸蘇州府吳縣人與長女金蓮次
女玉蓮隨夫寓九江府小江梅繼家正德十四年
五月夫往湖廣地方販易六月內宸濠作亂逆黨

率賊衆劫掠小江居民各奔命孫氏謂女曰我輩
異鄉人汝父又不在欲他往寔無可依柰何女曰
生死莫相離隨將長繩聯束二女謂隣曰夫還幸
語之母以我母子爲念遂投江身屍漂沒梅繼陳
綱等見聞是實七月內廷珪回江上招覓畢而回
籍去訖嘉靖十一年六月分守左叅政范永鑿閱
府誌見孫氏與二女貞烈案行府縣查勘死節緣
由立傳入誌呈奉巡撫都御史高 批再查孫

氏并二女如果同執死節行有司照例具

奏施行又呈巡按御史秦 蒙批韓廷珪係何等人
實作何生理孫氏寄語於夫何人聽見三婦投水
何人在傍目擊分巡九江道細勘呈繳隨蒙九江
兵備帶管分巡副使秦鉞備行府縣結勘回繳照
議得直隸蘇州府吳縣民韓廷珪妻孫氏女金蓮
玉蓮當逆濠作亂九江城將陷三腰聯絡長縷三
命齊赴大江逢比出於女流貞烈本於天植觀其

寄語於夫繩縛其女從容就死則孫氏尤烈焉有
地主梅繼等耳聞其言有隣佑陳綱等目擊其死
而參政范求鑾又爲之立傳以垂不朽如蒙准呈
特爲奏

請旌表門閭立廟奉祀真足以褒忠節於旣徃垂激勸
於將來矣再照此議之行非出於韓廷珪之營求
也非望於孫氏子孫之報謝也非由於姑蘇士民
之贊成也實秉彝好德之良心天理人情之不容

泯滅者真足以爲忠義風化之勸也等因具呈巡
撫都御史高 批再查孫氏并二女如果同執
死節備行有司照例具

奏施行府誌增入而今勘議緣由傳流于後巡按御
史秦 批節義大閑死生大事若非見理分明真
知欲惡有甚於生死者安能偕其二女貫以一繩
孫氏尚矣二女未至十四以上知有人道者恐難
一槩以節稱之該道再審確實行縣徑自奏

請施行本府具實奏

聞

九江府志卷之十三

三十五